



Aqqalu C. Jerimiassen
Atassut

UKA 2021/74
04. November 2021

Inatsisartut isummerfigisassaattut siunnersuut Naalakkersuisut peqquneqassasut meeqqat atuarfiannut tulluussakkamik inuit pisinnaatitaaffii pillugit atuartitsissutissanik kalaallisut ataqatigiisumik sananissamik aammalu taassuma saniatigut suliniutigineqassasoq, meeqqat atuarfianni atuartitsisut inuit pisinnaatitaaffii pillugit ilinniartitsinissamut pikkorissarneqassasut

(Inatsisartunut ilaasortaq Nivi Olsen, Demokraatit)

Meeqqat atuarfiata inerisartuarnissaa ullutsinnullu malinnaatittuarnissaanik siunnersuuteqartup siunertaqarnera siunnersuut atuarlugu malunnarluarpoq.

Isumarlu kivisiinnannginnissaanut taamaalilluni toqqammavissaqarluartoq takuneqarsinnaalluni.

Taamaattorli nalimmassarnissaq annertuumik pisarsiaqartuusorinarpoq uani pisarsiqarsorinarpoq. Aap, ilinniartissinnaaqaagut meerartagut allanik upperisaqarnermut suaaraqatiminoortartuunermullu tunngassuteqartunik.

Taakkuli qanoq paasitinniarneqarsinnaanissaannut pitsaasumik periusissiaqartariaqarneq avaqqukkuminaappoq.

Taamaattumik uani siunnersuummi siunertarineqartup assortuinngikkaluarlugit, siunissarlu ungasinnerusq angujartuaarneqarsinnaasutut takorloorluarsinnaangaluarlugit, allanik sammisanik pilersitsisoqarsinnaanissaa pingaarnerusorisinnaavarput.

Uani ilaatigut eqqarsaatigivarput, soorlu; meeqqat atuarfiini niuernermut aningaasarsiornermullu sammilivinnik sammisaqartalereersinnaaneq eqqunniarneqarsinnaangaluarpoq, tassuunakkullu malitsigisaanik tunngaviumik ilinniakkat “appasinnerusutut taaneqarsinnaasut” TNI-ikkutut ittut siunissaq ungasinnerusq isigalugu illikariartuartinneqarlersinnaammata, malittaaniullu niuernermut qaffasinnerusumik ilinniaqqinnissamut toqqaannarnerusumik matuulersinnalluarlutik.

Uani ilaatigut tigulaarilaartariaqarnera pisariaqartuutissinnaavara, meerartagummi maanna annerungaartumik inuttut akisussaaffeqarsinnaanissaannik ilinniartissinnaalluarluariguttaaq aqqutissanut ilaasinnaammat. Eqqarsaatigisaralu unaavoq, Japan-imi meeqqat atuarfianni sammineqartarpoq eqqiaaneq, eqqaamasaralu malillugu atuarfiit eqqiaasoqanngillat, tassa atuartuisa nammineq tamanna tamaat isumagisarpaat, siunissami namminiilernissaminnut akisussaaffimmik tiguisinnaalernissaminnut aqqutit ilaattut isigiinnarlugu.

Siunissami inuk nammineertoq pilersissinnaanarutsigu meeraaneraniik aallartereertariaqarparput, meeranerminilu akisussaaffimmik tiguseqataatinneqartarsimanermiguttaaq peroruni inersimasunngorluni tamanna attatissammaguttaaq. Naak immaqa tissinakannilaarsinnaangaluartoq taamannak Japan-imut assersuussininni, piviusoq unaammat, Japan nunatut nunarsuarmi



siuarsimanerpaanut ilaavoq, inuussutissarsiornikkullu pissarsuarnut ilaalluni, maannalu angerlarsimaffitsinni atortorissaarutigut nutaaliaasut arlalippassuit Japan-imiik aallaveqarsinnaasarlutik.

Siunnersuut tapersersornartillugu, taamaattoq oqaaseqaatikka tapullugit allannguutissatut siunnersuuteqarpunga imaattumik:

“Inatsisartut isummerfigisassaattut siunnersuut Naalakkersuisut peqquneqassasut meeqqat atuarfiannut tulluussakkamik inuit pisinnaatitaaffii, inuup ineriartorneranut inuussutissarsiornermullu atuartitsineq pillugit atuartitsissutissanik kalaallisut ataqatigiissumik sananissamik aammalu taassuma saniatigut suliniutigineqassasoq, meeqqat atuarfianni atuartitsisut inuit pisinnaatitaaffii pillugit, inuttut ineriartorneq inuussutissarsiorneq aningaasarsiernerlu sammivigalugit ilinniartitsinissamut pikkorissarneqassasut”.